

REGIONAL NEWS

HEADLINES:-

1. Kumin January leh February thla chungin Mizoramah Malaria vei hmuhchhuah tawh zat hi chu 1776 an ni tawh a, Malaria vanga nunna chan erawh anla awmlo.
2. National Health Mission NHM hnuaia Programme RBSK leh Ebenezer Medical Centre-te thawhhonain naupang lung natna neite enkawl a ni.
3. Naktuka Lok Sabha inthlan thawhhnihna nei turin inbuatsaihsaihna peihfel thawkhat a ni tawh.
4. Tukin khan Bangladesh chuan Myanmar sipai 288 an ramria himna zawnga lo tlan lutte chu Myanmar lamah a thawn haw.

<><><>

WORLD MALARIA DAY

Kumin January leh February thla chungin Mizoramah Malaria vei hmuhchhuah tawh zat hi chu 1776 an ni tawh a, Malaria vanga nunna chan erawh anla awmlo.

Vawiin khan Vector Borne Disease Control Programme, National Health Mission chuan MINECO ah World Malaria Day an hmang a. Heta tarlan anih dan chuan Mizoramah Malaria natna a la hluar hle a, ramchhunga Malaria vei tamna ber state nihna Mizoram hian a hauh mek bawk.

Nikum chhunga Malaria natna vei hmuhchhuah zawng zawng zat chu 18005 niin, mi 13-in nunna an chan phah a, kum 2022 nena khaikhinin Malaria vei hmuhchhuah tam zawng hi za zelah 76.02 in a pung a ni. Thawktute chuan he ni pual hian April thla chungin Malaria dona atana hmalakna hrang hrang an kalpui mek a, khawtlang mipui leh Pawl hrang hrang te nen inzirtirna hun te neihaan neih bakah, Banner/Poster Display bakah Source Reduction Drive -Thosi pian theihna tui tling tihbo hnatlang te an nei bawk.

Vawiin World malaria Day pual hun hi Health & Family Welfare Dept Additional Director (Planning) Dr. Hmingthanmawiin a kaihruai a, NHM Mission Director Dr. Eric Zomawian Mizoram Malaria dinhmun tlangpui a sawi a ni.

Lunglei-ah chuan World Malaria Day pualin Lunglei khawtlang leh kohhran hruaitu te bakah Zirna in sikul te nen Advocacy Meeting neih a ni a.

He hun hi Senior Chief Medical Office Dr. LC. Liana chuan kaihruaiin India ramah Malaria a hluar hle a, mihring tam takin Malaria vangin nunna an chan tawh a ni ati. Mizoram ah pawh Malaria hi a hluar hle a, Lunglei District chu Mizoramah Malaria vei tamna ber pahnihna a nih thu Dr. LC. Liana chuan he hun ah hian a sawi a. Malaria chu Health Department chauh in a do thei lova, mipuite tel lo chuan kalpui a harsat thu sawiin a huhova hmalakpuiah mipui techu a sawm.

Vawiin report a alan danin kum 2022 chungin Lunglei ah Malaria vei 2890 awmin kum 2023-ah 4950 an awm thu a. Kum 2023, January atanga December chungin Malaria vangin Lunglei District ah mitthi 3 an awm a ni. Thosilen semchhuah hmang te leh Self Help Group leh NGO te nen tuichhe tlinna leh thosi pian theihna tihfaia, Dengue laka invenna lamah te hmalak a nih tur thu thawktuten vawiin ni hian an sawi.

<><><>

MSU

Mizo Students' Union (MSU): General Headquarters, Aizawl chuan NIT Director Prof. S. Sundar hmuin Manipur buaina avanga Manipur-a zirna chhonzawm thei lo Zohnahthlak NIT zirlaite an zir chhonzawm theih dan tur an sawipui.

Kuki Student's Organisation te'n Manipur NIT zirlai 38-te tana tanpui an ngenna kal zelah MSU chuan NIT Director leh Registrar te hnenah Mizoram NIT-a zirna an chhonzawm theih dan tur ruahmansak turin an thlen a. Heng zirlaite hian Manipur buaina avangin class an kal chhonzawm thei tawh lova, semester hnih lai an thulh phah tawh thu MSU chuan NIT thuneitute hnenah an thlen a. NIT Mizoram Director chuan zirlaiten an chhonzawm ngei theihna turin Ministry of Education leh NIT Manipur Director hnenah a thlen tur thu sawiin, tun dinhmunah exam buatsaih mai tur a nih tawh avangin semester tan leh hma August ni 1, 2024 hma chuan zirlaite dinhmun tur pawh hriat theih a beisei thu MSU hruaitute chu a lo hrih a. Zirlaite pawh eng tik lai pawhin class an chhim a phal reng thu a sawi bawk.

Manipur state buaina avanga Zofa zirlai harsatna tawkte tan MSU Pisa a inhawng reng a, zirlai nu leh pate pawh inthlahrung lova harsatna an tawh te thlen zel turin a hriattir bawk a ni.

<><><>

SELCO

Social Welfare and Tribal Affairs Dept leh SELCO Foundation (SF) te chuan vawiin khan Aijal Club-ah meeting an nei, state chhunga Decentralized Renewable Energy (DRE) hmanga khawsak phung hmasawna atana thawhhona tha tak an neih theih nan he hun hi buatsaih a ni.

State Lead, SELCO Foundation (SF)- Pu Lalnuntluanga Colney chuan state chhunga eizawna tihchangtlunna leh boruak inthlak danglamna tih ziaawmna kawnga Sustainable renewable driven approach neih apawimawh hle a ni ati.

Social Welfare and Tribal Affairs Director Dr. Lalhriatzuali Raltechuan department scheme, policy leh programme awm tawhte nena DRE solutions hmanga eizawna tihchangtlunna kawnga hlutna belhchhah theih dan tur te a sawi a. Directorate of Social Welfare & Tribal Affairs hnuai ah rualbanlo te leh hmeichhe chanhai leh rahbi tleu te tan puanthui zirna a awm thu sawiin heng an puanthui khawl te hian nizung chakna (solar energy) hmang thei tura hmalak an tum thu leh training centre tihchangtlun kawngah SELCO nena thawhho tha tak an neih a beisei thu a sawi bawk.

Dr. Lalhriatzuali chuan Directorate hnuai ah vek hian Tribal Research Institute (TRI), Kelsih ami chu hman theih ani thui dawn ati a, helai hmunah hian Nizung chakna (Solar Energy) mamawh anih dawn thu a sawi bawk. Sawrkar thara Hand-holding policy hnuai ah hmachhawp hrang hrang an neih thu a sawi a, chung an hmachhawp ah chuan sawrkar in a bul alo tan tawh Phunchawng leh Rangvamual bawra 'Mission Chhanchhuahna' chu tih changtlun chhonzawm a, Jail tang chhuakte tana kut themthiam thil zirtirna hmun atana heng hmun tehi an duan mek thu a sawi a, Smart Tribal Village- thingtlang tihchangtlun dan tur chu duan mek anih thu a sawi bawk.

He hun ah Dr. Lalhriatzuali Ralte chuan Renewable Energy Driven Solutions hmangin Mizoramah grassroot solutions tih chak a, thui tak ke pen an in beisei thu a sawi.

DRE Solution (Solar Sewing Machine) hmang a eizawng mek F. Lalremtluangi chuan DRE solution a hman tangkai thu a sawi a, DRE a hman atang in current a

awm loh chang pawhin khaihlak miah loin a puanthui a chhonzawm zel theih tawh thu a sawi.

SELCO Foundation te chu kum 2023 January thla khan Mizoramah rawn lutin, Mizorama eizawna lama harsatna awmte sutkian nan Renewable Energy (Solar) hmangin Livelihood Sector hrang hrang te- Lo neih, ran vulh leh sumdawna tenau te tih hmasawn a ni.

<><><>

RBSK

National Health Mission NHM hnuai Programme Rastrya Bal Swasthya Karyakram (RBSK) leh Ebenezer Medical Centre-te thawhhonain naupang lung natna neite tana buatsaih Congenital Heart Disease Screening Camp tum 6-na chu Ebenezer Medical Centre, Chawnpui, Aizawlah neih a ni.

Vawiina screening camp hawna hun hi Directorate of Health Services Director Dr. Lalremmmawin a kaihrui a. Nausen atanga kum 18 inkar, lung na neite zawn chhuah a, a tul anga hmalakpuina hun buatsaih a ni thei chu lawmawm a tih thu sawiin RBSK programme kaltlanga naupang tam tak ten nun nuam leh hrisel zawk an neih phah ngei theih nan duhsakna a hlan a. Hemi hnu hian Dr.Vanlalsiama, Medical Director, Ebenezer Hospital chuan mite tana malsawmna thlentu ni tur leh lung natna avanga tanpuina mamawh ngawih ngawihte tana tangkaina nei thei tura RBSK Programme nen thawhhona an nei thei chu thil lawmawm leh chhinchhiah tlak tak a nih thu a sawi bawk.

RBSK puihna in vawiin thleng hian naupang 90 chuang lung zai ngaite Hospital Bill RBSK chuan a tumsak tawh a. RBSK hian kum liamtaah khan state pawn hospital-te nen tangkawpin screening camp tum 5 a lo buatsaih tawh a ni. State pawn Bangalore leh Imphal lama RBSK puihna a naupang lung zai tawhte pawh anni hian an lo enkawl chhonzawmsak thin a ni. Kumin hian Mizoram damdawi inah ngei, Mizo Cardiologist/Lung lam mithiam Dr. Vanlalmalsawmdawngliana hovin Screening Camp hi neih a ni.

RBSK leh Ebenezer Medical Centre-te hian kum 2024 January ni 25 khan thawhhona thuthlung MoU an zia fel a, he inremna bawh zui hian vawinah Screening Camp hi buatsaih a ni ta a ni. He Screening Camp-a naupang lung enkawl ngai thlan chhuahte hi Ebenezer Medical Centre-ah enkawl an ni anga, an inenkawl na sensote hi RBSK, NHM, Mizoram chuan a tumsak dawn a ni.

Vawiina Screening Camp-ah hian nau piang hlim atanga kum 18 inkar lung lama harsatna nei, veng leh khaw hrang hrang atanga naupang lo kalte nilengin en an ni a. He thu buatsaih a nih lai chawhnu dar 3 thleng khan lung lama harsatna nei naupang 186 Echo Screening tihsak an ni tawh a. Registration ti hi an la awm zel bawk a ni.

<><><>

MAMIT CRIME

Kumin kumtir atangin vawiin thlengin Mamit Police Station ah thubuai 31 ziahluh a ni tawh a, nikum hemi hun chung aiin thubuai ziah luh zat hi 4 in a tam zawk.

Mamit Police Station ah hian thubuai ziahluh 31 atanga thubuai 9 te chu chhui zawh tawh niin abak thubuai ziahluh dang 22 te chu chhuilai mek an ni a. Hetih mek lai hian nikum lam a thubuai ziahluh tawh kumin a chhui fel tawh 18 a awm bawk a ni.

Tum dang ang bawkin kumin a Mamit Police Station a thubuai ziahluh 31 zinga a tam ber chu rukruk thubuai a ni a, rukruk thubuai bakah hian naupang kum

tinglo khaikhemna POCSO thubuai 2, lirthei chet suaIna leh thubuai dangte a tel a ni.

Mamit Police Station huam chhungah hian Mamit khawpui bakah a chheh vel khaw 13 a awm a, heng zinga khaw 4 te chu lirthei a kal pawh theih loh, ke leh lawngleng hmanga kal ngai kuate an ni.

<><><>

LOK SABHA 2ND PHASE

Naktuka Lok Sabha inthlan thawhnhina nei turin inbuatsaihsaihna peihfel thawkhat a ni tawh a. Nizan khan campaign hun a tawp a ni.

Inthlan thawh hnihnaah hian Parliament constituency 88 ah vote thlak tur a ni a. Inthlan thawhnhinaa tel ve tur Madhya Pradesh-a Betul (ST) Parliamentary Constituency chu BSP candidate a thih avangin inthlan thawh thumnaah sawn a ni a.

State 13 leh Union Territory pakhatah vote thlak a ni dawn a. Kerala-ah seat 20, Karnataka-a seat 28 awm atangin seat 14, Rajasthan-a seat 25 atangin seat 13, Uttar Pradesh leh Maharashtra ah seat 8 ve ve, Madhya Pradesh ah seat 5, Assam leh Bihar ah seat 5 ve ve, West Bengal leh Chhattisgarh ah seat 3 ve ve leh Tripura leh Jammu and Kashmir-ah seat khat ve veah inthlan a ni ang. Hei bakah hain Outer Manipur parliamentary constituency chhunga Assembly bial 13-ah vote thlak a ni bawk ang.

Candidate hi an vaiin 1198 an awm a, heng zinga pali hi Outer Manipura Lok Sabha ami an ni

<><><>

ECI ON MCC

Election Commission of India chuan Lok Sabha inthlanpui neih mekah Senior BJP leader Narendra Modi leh Congress leader Rahul Gandhi ten model code of conduct an bawhchia nia puhnaah hma a la. ECI chuan BJP President JP Nadda leh Congress President Mallikarjun Kharge te hnenah tun thla ni 29 chawhma dar 11 hmain insawifiah turin a ti a.

ECI chuan star campaigner zawng zawngte chu entawn tlaka campaign tur leh MCC chu a thu leh a taka zawm turin a chah a ni.

ECI-a hekna lutah hian Congress, CPI leh CPI(M) te chuan Rajasthana Baswara-ah Senior BJP leader Narendra Modia chuan inhuatna rawngkai thu a sawi niin an puh a. Hetihlai hian BJP te chuan Kerala-a Kottayam ah Rahul Gandhi-a thusawi chungchangah lungawilohna an thelut thung a ni.

<><><>

US

US President Joe Biden-a Ukraine, Israel leh Taiwan puihna tur dollar tluklehdingawn 95 hman a remti. President Biden-a chuan White House-ah America tan ni lawmawm a ni tih sawiin hetiang bawk hian Ukraine tan ni lawmawm ani a, khawvel remna atana ni lawmawm a ni a ti bawk. US Senate ten tanpuina pekna tur bill an pass hnuah President Biden-a hian a hming a ziah hnan veleh a.

Dollar tluklehdingawn 95 atang hian Ukraine hnenah dollar tluklehdingawn 61, Israel hnenah dollar tluklehdingawn 26 leh Indo-Pacific lamah dollar tluklehdingawn 8 pek a ni ang. He bill ah hian US-a Tiktok khapna a tel bawk a. He apps neitu China-a inkulh Bytedance te chu thla 9 chhunga an hralh loh chuan US ah khap a ni dawn tih tarlan a ni.

<><><>

BANGLADESH

Tukin khan Bangladesh chuan Myanmar sipai 288 an ramria himna zawnga lo tlan lutte chu Myanmar lamah a thawn haw. Myanmar sipai thawn haw zingah hian Myanmar Border Gaurd Police (BGP), army leh immigration unit te an ni a. Bangladesh Border Gaurds te chuan tukin dar 6 khan Bangladesh Inland Water Transport Authority ruahmannain thawnhaw an nih thu an tarlang.

Bangladesh chuan Myanmar nena an inrinaah hian khauh takin venhimna a kalpui mek a. Hei hi a chhan chu Myanmar sipai Junta Troop te leh Arakan Army te Rakhine bial vela nasa taka an inkah vang a ni a. Bangladesh leh Myanmar hian ramri km 271 a thui an nei a ni.

<><><>